


渭南文集目錄

卷第二十五



夔州勸農文

丁未嚴州勸農文

戊申嚴州勸農文

書通鑑後

又

書賈充傳後

書郭崇韜傳後

書安濟法後

書空青集後

書浮屠事

書渭橋事

書包明事

書神僊近事

書屠覺筆

書二公事

渭南文集卷第二十五目錄

終

渭南文集卷第二十五

山陰陸游務觀著

夔州勸農文

仰惟天子臨遣牧守每以務農勸課之指丁寧
訓敕雖遐陬僻邑如在畿甸惟懼一穀之不登
一夫之失職也硤中之郡夔爲大其於奉明詔
以倡屬郡慰齊民者尤不敢不勉繼自今不縱
捨克不長囂訟不傷爾力不奪爾時爾父兄子
弟其亦恭承天地惠澤毋爲惰遊毋怠東作毋

失收歛毋嫚蓋藏勤以殖產儉以足用有司與民交致其愛使公私之蓄日以富饒無貽朝廷宵旰之憂豈不韙哉丁未嚴州勸農文蓋聞農爲四民之本食居八政之先豐歉無常當有儲蓄吾民生逢聖世百穀順成仰事俯育各遂其性太守幸得以禮遜相與從事於此故延見高年勞問勸課致誠意以感衆心非特應

法令爲文具而已今茲土膏方動東作維時汝其語子若孫無事末作無好爭訟深畎廣耜力耕疾耘安豐年而憂歉歲太守亦當寬期會簡追胥戒興作節燕遊與吾民共享無事之樂而爲後日之備豈不美哉

戊申嚴州勸農文

蓋聞爲政之術務農爲先使衣食之麤充則刑辟之自省當職自蒙朝命來剖郡符雖誠心未

格於豐穰然拙政每存於撫字觴酒豆肉曷嘗
妄蠹於邦財銖漆寸絲不敢輒營於私利所冀
追胥弗擾墾闢以時春耕夏耘仰事俯育服勞
南畝各終蔗蓂之功無犯有司其樂舒長之日
今者土膏旣動穡事將興敢延見於耆年用布
宣於聖澤清心省事固守令之當爲曠土游民
亦父兄之可耻歸相告戒恪務遵承上以寬當
宁之深憂下以成提封之美俗

書通鑑後

司馬丞相曰天地所生財貨百物止有此數不
在民則在官其說辯矣理則不如是也自古財
貨不在民又不在于官者何可勝數或在權臣或
在貴戚近習或在強藩大將或在兼并或在老
釋方是時也上則府庫殫乏下則民力窮悴自
非治世何代無之若能盡去數者之弊守之以
悠久持之以節儉何止不加賦而上用足哉雖

捐賦以予民吾知無不足之患矣彼桑弘羊輩何足以知之然遂以爲無此理則亦非也

周世宗旣服江南諭使修守備通鑑以爲近於大邦畏其力小邦懷其德是比之文王也方是時世宗將有事於燕晉其謀以爲若南方有變雖不能爲大害然北伐之師勢亦不得不還故先息有以安江南之心又疲其力於大役使不

得動比北伐成功江南折簡可致矣此世宗本謀也遽謂之近於文王豈不過哉然世宗之謀則誠奇謀也蓋先取淮南去腹心之患不棄勝取吳蜀楚粵而舉勝兵以取幽州使幽州遂平四方何足定哉甫得三關而以疾歸則天也其後中國先取蜀南粵江南吳越太原最後取幽州則兵已弊於四方而幽州之功卒不成故雖得諸國而中國之勢終弱然後知世宗之本謀

爲善也

書賈充傳後

言一也情則三也其惟論兵乎自古惟用兵最多異論以其有是三者也禍機亂萌伏於隱微人知兵之利不知其害有識者焉逆見而力止之王猛之於秦是也投機之會轉眄已移而常人闇於事機私憂過計馮道之於周是也猛固賢矣道雖闇猶有憂國之心焉至於賈充當晉

武時力沮伐吳之舉至請斬張華則何說哉自漢之季百數十年間庸人習見南北分裂謂爲故常赤壁之役以魏武之雄乘破竹之勢而大敗塗地終身不敢南鄉充之心蓋竊料吳未可下因爲先事之言以徼後日之福而不料天下之遂一也要之戰危事也以舜爲君禹出師不能一舉而定三苗以唐太宗自將李勣在行不能遂平區區之高麗故爲充之說者常有利焉

此人臣之陰爲身計者所以多出於此也馮道不足言矣王猛賈充之論所謂差毫釐而謬千里者可不察哉

書郭崇韜傳後

後唐莊宗初得天下欲立愛姬劉氏爲后而韓夫人正室也伊夫人位次在劉氏上莊宗雖出夷狄又承天下大亂禮樂崩壞之際然顧典禮人情亦難其事未知所出羣臣雖往往阿諛亡

學術然亦無敢當其議者豆盧革爲相郭崇韜爲樞密使崇韜功高迹危思爲自安計而革庸懦無所爲惟諂崇韜以自安因相與上章言劉氏當立於是莊宗遂立劉氏爲后劉氏旣立黷貨蠹政殘賊忠良天下遂大亂莊宗以弑崩李氏之子孫殲焉嗚呼革不足言矣崇韜佐命大臣忠勞爲一時冠其請立劉氏非有他心也不過謂天子所寵昵而自結焉將賴其助以少安

而已然唐之亡實由劉氏是亡唐者崇韜也後唐之先皆有勲勞於帝室晉王克用百戰以建王業莊宗因之遂有天下同光之初海內震動幾可指麾而定矣而崇韜顧區區之私引劉氏以覆其社稷而滅其後嗣宗廟之靈其肯赦之乎崇韜卒以盡忠赤其族革亦無罪誅死豈非天哉晉唐高宗欲立武昭儀爲后大臣褚遂良等力爭以爲不可者皆得禍獨李勣勸成之窮

極富貴而死自謂得計矣及武氏得志唐高祖太宗之子孫誅戮幾盡而勣雖已死亦卒以孫敬業故發墓剖棺夷其宗族遂良等雖得禍不至此也天理之不可逃如此雖然豈獨天理哉彼勣與崇韜皆武夫烈士勇於報德乃以此心揣婦人以爲自安之奇策安知婦人之性陰忮忍毒果於背德方其得志自肆若豺虎然豈復思得立之所自哉然則二人之禍雖微天理固

有不可逃者矣悲夫

書安濟法後

當安濟坊法行時州縣醫工之良者憚於入坊越州有庸醫曰林彪其技不售乃冒法代它醫造安濟今日傳容平當來則林彪也明日丁資當來又林彪也又明日僧寧當來亦林彪也其治疾亦時効遂以起家然里巷卒不肯用比安濟法罷林彪已爲溫飽家矣年八十餘乃終開

禧乙丑四月七日務觀書

書空青集後

建中靖國元年景靈西宮成詔丞相曾公銘於碑以詔萬世碑成天下傳誦爲宋大典且歎曾公耆老白首而筆力不少衰如此建炎後仇家盡斥曾公文章始行於世而獨無此文或謂中更喪亂不復傳矣淳熙七年某得曾公子寶文公遺文於臨川然後知其寶文公代作蓋上距

建中八十年矣嗚呼文章鉅麗閎偉至此使得
用於世代王言頌成功施之朝廷薦之郊廟孰
能先之而終寶文公之世士大夫莫知也汪翰
林平生故人及銘其墓惟曰始爲家賢子弟中
爲時勝流晚爲能吏是豈足以言公哉公家世
固以文章名天下又自少時所交皆諸父客天
下偉人出入試用亦數十年芻蕘滿朝然世猶
不盡知之如此況山林之士老於布衣所交不

出閭巷其埋沒不耀抱材器以死者可勝數哉
可勝歎哉九月十九日山陰陸某書

書浮屠事

浮屠宗師杲宛陵人法一汴人相與爲友資皆
豪傑負氣好遊出入市里自若已乃折節同師
蜀僧克勤相與磨礪浸灌至忘寢食遇中原亂
同舟下汴杲數視其笠一怪之伺杲起去亟視
笠中果有一金釵取投水中杲還亡金色頗動

一叱之曰吾期汝了生死乃爲一金動邪吾已投之水矣杲起整衣作禮曰兄真宗杲師也交益密於虜世多詆浮屠者然今之士有如一之能規其友者乎藉有之有如果之能受者乎公卿貴人謀進退於其客客之賢者不敢對其不肖者則勸之進公卿亦以適中其意而喜謀於子弟亦然一旦得旣其客其子弟則曰使吾公早退可不至是而公卿亦歎曰向有一人勸吾

退豈至是哉然亦晚矣

書渭橋事

中大夫賈若愚宣和中知京兆櫟陽縣夏夜以事行三十里至渭橋夜漏欲盡忽見二三百人馳道上衣幘鮮華最後車騎旌旄傳呼甚盛若愚遽下馬避於道傍民家且使從吏詢之則曰使者來按視都城基漢唐故城王氣已盡當求生地此十里內已得之而水泉不壯今又舍之

矣語畢馳去如飛時方承平若思大駭明日還縣亟使人訪諸府則初無是事也若思河朔人自櫟陽從蔡靖辟爲燕山安撫司管勾機宜文字靖康中自燕遯歸入尚書省爲司封郎而卒陸某曰河渭之間奧區沃埜周秦漢唐之遺跡隱鱗故在自唐昭宗東遷廢不都者三百年矣山川之氣鬱而不發藝祖高宗皆嘗慨然有意焉而羣臣莫克奉承予得此事於若思之孫逸

祖豈關中將復爲帝宅乎虜暴中原積六十七年腥聞於天王師一出中原豪傑必將響應決策入關定萬世之業茲其時矣予老病垂死懼不獲見故私識若思事以示同志安知士無脫輓輅以進說者乎

書包昉事

包昉者不知其鄉里少爲兵事湯岐公自樞密至左相昉常在府紹興末岐公以御史論罷故

例一府之人皆罷遇拜執政則往事焉久之御史中丞汪公澈拜參知政事一府皆往汪公蓋前日劾岐公者也於是昉獨不肯往曰是嘗論擊吾公者持何面目事之雖妻子饑寒不之顧未幾以病死方岐公貴時所薦達士大夫多矣至其失勢不反噬以媚權門者幾人且岐公平日待昉非有異於衆人也汪公之拜一府俱往非獨昉也昉而往事汪公非有負也泥塗賤隸

又非清議所及而其自信毅然不移如此蓋有古烈士之風矣書其始末使讀者有感焉

書神僊近事

管道士侯道華喜讀書或問其意答曰天上無凡俗神僊後果騰舉而去呂洞賓陳搏賀元施肩吾皆本書生近歲有譙定雍孝閔尹天民亦皆以儒士得道定今百二十餘歲故在青城山中采藥道人有見之者讀易尙不輟也孝閔或

自稱木先生往來沔鄂間天民客青城儲福宮
一日大罵所與往來道士卽閉門睡道士明日
相率謝之而門不啓壞壁視之危坐死矣方相
與驚歎俄失所在此三人者皆顯人故其事傳
閭巷山澤之士名迹湮晦本不爲人知者又可
悉數哉予從子慧綽爲浮屠爲予言豫章西山
香城寺之傍有埜人身被綠毛每雨霽多坐石
上暴日見人輒避去追之不可及有識者曰此
馬祖弟子亮座主者乃知長生久視之道人人
可以得之初不必老氏之徒也因書置座右以
自勵云

書屠覺筆

建炎紹興之間有筆工屠希者暴得名是時大
駕在宋都在廣陵又南渡幸會稽錢塘希嘗從
駕自天子公卿朝士四方士大夫皆貴希筆一
筒至千錢下此不可得晁侍讀以道作詩稱譽

之有吳生先師中字茂先得其筆以一與先少師希之技誠絕人入手卽熟作萬字不少敗莫能及者後七十餘年予得其孫屠覺筆財價百錢入手亦熟可喜然不二百字敗矣或謂覺利於易敗而速售是不然價旣日削矣易敗則人競趨它工覺固不爲書者計獨不自爲計乎乃書希事庶覺或見之

書二公事

鄭介夫名俠以剛直名天下晚居福清自號一拂居士布衣糲食而雜植華木於舍傍觴詠自適客至必與飲多不過五爵蔬果之外一肉而已遇貧士過者亦薄贐之止於千錢飲具皆白蠟或遺以銀盃辭不取好強客弈碁有辭不能者則畱使旁觀而自以左右手對局左白右黑精思如真敵白勝則左手斟酒右手引滿黑勝反是如是幾二十年如一日謝昌國名諤嘗聞

道於頤正郭先生居臨江名其廬曰艮齋晨興
烹豆腐菜羹一釜偶有肉則縷切投其中客至
亦不問何人輒共食有貧士及醫卜之類飯已
輒語之曰吾無錢子君豈欲詩乎取幅紙作絕
句贈之以爲常二公皆予所鄉慕也予貧甚欲
學介夫辦五孟千錢亦復未易又不解弈碁或
可力貧學昌國耳書之座右當徐圖之紹熙之
元十二月八日九曲老樵書

渭南文集目錄

卷第二十六

渭南文集目錄

卷第二十六

真廟賜馮侍中詩 高宗聖政草

高宗賜趙延康御書

高宗御書二 又

今上皇帝賜包道成御書崇道菴額

跋尹耘師書劉隨州集

跋唐御覽詩 跋文武兩朝獻替記

跋杲禪師蒙泉銘

跋修心鑑

跋邵公濟詩

跋坐忘論

跋查元章書

跋高象先金丹訣

又

跋天隱子

跋造化權輿

跋老子道德古文

跋卍菴語

跋武威先生語錄

跋關著作行記

跋司馬子微餌松菊

法

跋周茂叔通書

跋岑嘉州詩集

跋二賢像

跋山谷先生三榮集

跋硯錄香法

跋唐修撰手簡

跋蔡君謨帖

跋瘞鶴銘

跋西峴酬唱集

跋歷代陵名

跋溫庭筠詩集

跋王君儀待制易說

跋崔正言所書書法要訣

跋後山居士詩話

跋佛智與升老書

跋古栢圖

渭南文集卷第二十六目錄

終

渭南文集卷第二十六

山陰陸游務觀著

真廟賜馮侍中詩

其家舊藏孝嚴殿繪像先正侍中馮公在焉冠
劍偉然與大行黃河氣象相埒每稽首歎曰侍
中輔相兩朝更天下大變而社稷尊安夷狄讐
服鉏耰萬里無犬吠之警有以也夫晚待罪新
定公之孫頎出示章聖皇帝賜詩又以想見一
時盛事恨不生其時俯伏沙隄旁窺望風采云

某被命修光堯皇帝聖政草創凡例網羅放逸雖寢食間未嘗置也然不敢以稿畱私篋暇日偶追記得此命兒輩錄之隆興二年十月一日左通直郎通判鎮江軍府事陸某記

高宗賜趙延康御書

右知金壇縣趙君師懇錄高宗賜其大父延康公書及延康移僞楚書共爲一編以示史官陸

某某曰延康在宣和靖康間聲望風采震曜一時及守宛丘百戰禦狂虜卒全其城視唐代張巡許遠顏真卿皆過之來朝行在高皇蓋欲以左轄命之議者謂宗室輔政非故事遂止方公之南徙也謝表有云臣本支百世侍從三朝又云堅壁以保近畿慨前功之俱廢登壇而陪盛禮懷曩遇以自憐讀者悲之某又嘗於公從孫師嚴有翼家見公建炎奏議稿一編皆人所至

明本三十四篇

難言者不知此稿皆在鑑堂集中否或可訪於
有翼院中以補逸遺敢併以告嘉泰癸亥歲三
月丙申臣某謹識
高皇御書二
臣某少時與胡尚書之子杞同學於雲門山中
見高皇帝賜尚書御題扇曰文物多師古朝廷
半老儒蓋黃體也與此手詔絕相類後數年蒙
收召得面天顏距今四十四年矣伏讀寶涕不

明本三十四篇

又

知所云嘉泰癸亥五月一日史官臣陸某謹題

臣某伏覩高皇帝御天下幾二十年進用諫官
御史皆出聖選故往往躡至相輔其不合者猶
爲侍從乃去如施公財任遺補卽出守小郡蓋
無幾人則其犯顏拂指不撓於權倖可以想見
而上之知人受盡言有仁祖用范仲淹唐介之
風矣惜乎施公遽逝去不及召用於虜悲夫開

禧乙丑九月一日故史官陸某謹書
今上皇帝賜包道成御書崇道菴額
開禧某年某月甲子皇帝親御翰墨書崇道菴
三字賜妙行先生臣包道成以示故史官臣陸
某將刻之石具載歲月及被賜之由示天下後
世臣某竊聞臣道成實晉陵人少學黃老之說
以劬身濟衆爲事寓跡都城三十餘年築堂以
居凡以黃冠褐衣至者靡不館之往來千人蓋

嘗有神僊異人混於衆中道成獨默識之而不
言會稽光孝觀故名乾明天聖間章獻明肅皇
后遣中使築之久壞不葺道成談笑復其舊凡
都城橋梁道路皆力治之費至緡錢百餘萬建
東嶽廟吳山上旣成又卽其傍築室以奉真武
左江右湖氣象雄麗而道院屹立于廡外鐘磬
步虛之聲在雲霄間都人爲之心駭神竦於是
皇帝聞而異之故有扁榜之賜臣某犬馬之年

駸駸九十獲在聖主仁壽域中且嘗獲紬繹三
朝金匱石室之藏今雖篤老猶幸未病廢得以
紀稀濶盛事豈非幸哉開禧二年歲在丙寅三
月某曰太中大夫充寶謨閣待制致仕山陰縣
開國子食邑五百戶賜紫金魚袋臣陸某昧死
稽首再拜謹書

跋尹耘師書劉隨州集

傭書人韓文持束紙支頭而睡偶取視之劉隨

州集也乃以百錢易之手加裝褫紹興二十五
年正月八日陸某記

尹耘師耕鄉里前輩與九伯父及先君游此集
蓋其手抄云紹熙元年七月望某再跋

跋唐御覽詩

右唐御覽詩一卷凡三十人二百八十九首元
和學士令狐楚所集也按盧綸墓碑云元和中
章武皇帝命侍臣采詩第名家得三百一十篇

公之章句奏御者居十之一今御覽所載綸詩正三十二篇所謂居十之一者也據此則御覽爲唐舊書不疑然碑云三百一十篇而此纔二百八十九首蓋散逸多矣姑按定訛謬以俟完本御覽一名唐新詩一名選集一名元和御覽云紹興乙亥十一月八日吳郡陸某記

跋文武兩朝獻替記

學者當以經綸天下自期此書不可不見也但

傳本繆誤幾不容讀以它書尋繹之十得四五云紹興丙子臘日務觀題

跋杲禪師蒙泉銘

右妙喜禪師爲良上人所作蒙泉銘一首往予嘗晨過鄭禹功博士坐有僧焉予年少氣豪直據上坐時方大雪寒甚因從禹功索酒連引徑醉禹功指僧語予曰此妙喜也予亦不辭謝方說詩論兵旁若無人妙喜遂去其後數年予老

於憂患志氣摧落念咎之狂痛自悔責然猶冀
一見作禮懺悔孰知此老遂棄世而去邪雖然
良公蓋一世明眼衲子不知予當時是卽今是
試爲下一轉語隆興改元十一月五日笠澤漁
隱陸某書

跋修心鑑

右高祖太傅公修心鑑一篇初公生七年家貧
未就學忽自作詩有神僊語觀者驚焉晚自號

朝隱子嘗退朝見異人行空中足去地三尺許
邀與俱歸則古僊人嵩山栖真施先生肩吾也
因受鍊丹辟穀之術尸解而去然其術祕不傳
今惟此書尚存某旣刻版傳世并以七歲吟及
自贊附卷末庶幾篤志方外之士讀之有所發
焉亦公之遺意也隆興二年七月二日元孫某
謹書

跋邵公濟詩

先子入蜀時與邵子文遇於長安同遊興慶池
有詩倡酬相得驩甚夜讀公濟詩超然高逸恨
未嘗得講世舊與文盟也乾道元年五月十八
日笠澤漁隱陸某書

跋坐忘論

司馬子微師體玄先生潘師正體玄師昇玄先
生王遠知昇玄師貞白先生華陽隱居陶弘景
故體玄語子微曰吾得陶隱居正一法逮汝四

世矣乾道二年天慶節借玉隆藏室本傳漁隱
子手記

跋查元章書

李份事士大夫謹以故得書帖多不可數然閱
其書至不敢與他札偕藏者元章吏部一人而
已份一吏耳知敬元章如此豈知元章仕於朝
既不容去而居幙府又不容自引於數千里外
赤甲白鹽之間乃少安嗚呼亦可歎也夫丙戌

上元後三日漁隱書

跋高象先金丹訣

右玉隆萬壽觀本序言有注解而不傳亦不知序者爲何人也丙戌二月八日務觀書

又

國初有高象先淳化中爲三司戶部副使少從戚同文學與宗度許驤陳象輿郭成範王礪滕涉齊名不言其所終亦不知其鄉里恐卽此人

俗案滕作勝疑爲
滕之誤

然序言名先字象先又似別一人神仙隱顯不可必知聊記之耳辛亥炊熟日書

跋天隱子

最後易簡漸門二說非天隱子本語他日錄本當去之丙戌三月中休傳本於玉隆萬壽宮漁隱

東坡先生以爲天隱子真司馬子微所著也傳本後二十五年紹熙庚戌冬至日書

本外跋造化權輿

先楚公著埤雅多引是書然未之見也乾道三年孟夏十八日傳自玉隆藏室甫里陸某謹題

當去跋老子道德古文

右漢嚴君平著道德經指歸古文此經自唐開元以來獨傳明皇帝所解故諸家盡廢今世惟此本及貞觀中太史令傅奕所校者尙傳而學者亦罕見也予求之踰二十年乃盡得之玉笈

藏道書二千卷以此爲首漁隱陸某題乾道二年十月十日

跋卮菴語

乾道庚寅十月入蜀舟過公安二聖見祖珠長老得此書珠自言南平軍人得法於卮菴云

五畢跋武威先生語錄

豐清敏公爲中執法論事上前曰司馬光呂公著皆忠賢何爲引赦復官赦當及有罪耳無罪

何赦也徽祖曰光等變先帝法度非罪乎清敏公頓首曰誠當變無可罪者方元符建中間衆正畢集於朝天下喁喁想望太平清敏公與陳忠肅公俱極諫官御史之選而所以言則有婉直之異吾先大父楚公每以爲二公之論皆不可廢蓋忠肅似孟子說齊而清敏似伯夷諫周其歸一也今觀武威先生之論又甚似清敏百世之下志士仁人得此書讀之當有太息流涕

者矣乾道七年立秋日山陰陸某書

跋關著作行記

著作關公出使硤中風采峻甚仕者人人震慄莫敢仰視某以孤生起臯籛萬里佐州淺闇滯拙自期且汰去而關公獨厚遇之舉酒賦詩談臺閣舊事忘其位之重也公免歸之明年某以事至臥龍山咸平寺長老惠璉言公往有行記今將刻之石因屬某書其末某曰方關公之門

可炙手時此書伏不出今公歸臥青城山中賓客解散形勢一變而璉方刻其書爲不朽計嗟乎足以愧士大夫矣乾道七年七月七日左奉議郎通判夔州軍州主管學事陸某謹識

跋司馬子微餌松菊法

乾道初予見異人於豫章西山得司馬子微餌松菊法文字古奧非妄庸所能附託八年又得別本於蜀青城山之丈人觀齋戒手授傳之同

志十二月六日笠澤漁翁陸務觀書於玉華樓

跋周茂叔通書

濂谿之生也世但以佳士許之耳旣死蒲左轄作誌黃太史作詩其稱述亦不過如此向使無二程先生後世豈知濂谿爲大儒傳聖人之道者邪以此知士之埋沒無聞者何可勝計乾道壬辰十二月十五日成都驛南窗書

跋岑嘉州詩集

予自少時絕好岑嘉州詩往在山中每醉歸倚胡床睡輒令兒曹誦之至酒醒或睡熟乃已嘗以爲太白子美之後一人而已今年自唐安別駕來攝犍爲旣画公像齋壁又雜取世所傳公遺詩八十餘篇刻之以傳知詩律者不獨備此邦故事亦平生素意也乾道癸巳八月三日山陰陸某務觀題

跋二賢像

右孟貞曜歐陽率更二像皆唐人筆墨北湖者吳則禮子傳也無悔者劉燾無言也最後實先君會稽公茶山先生曾文清公書萬里羈旅不自意全撫卷流涕乾道九年九月旣望刻石置漢嘉月榭上山陰陸某識

跋山谷先生三榮集

予集黃帖得贈元師及王周彥三詩甚愛之有黃淑者家三榮見而笑曰紹興中再刻本也舊

石方黨禁時已磨毀矣乃出此卷曰是舊石本其筆力精勁蓋如此因錄藏之淳熙之元二月二日務觀書

跋硯錄香法

硯錄舊有本而亡之香法蓋未之見師房者濟南衛昂也娶婆婆先生崔德符女晚官已歿死焉乾道辛卯冬予得此編於巫山縣師房手鈔也已腐敗不可讀乃錄藏之後三年淳熙之元

二月三十日蜀州漱玉南窗務觀書

跋唐修撰手簡

某之曾外大父質肅唐公守并州故給事中呂公實爲幙客質肅爲人方嚴少許可或面折人臨川王和甫同時在幙中每言見唐公退輒汗滿握然遇呂公特歡他客莫敢望也淳熙元年某在蜀州得質肅仲子修撰公與給事手帖讀之蓋元祐初修撰使河北給事爲御史時也書

論黃河市易辭指激烈無一語及其私與世俗
責報父客至有違言者何其遠哉修撰字君益
元祐中建議棄渠陽城紹聖初坐貶團練副使
元符建中之間起守許昌方治事得報召蔡京
撫案憤咤卽曰疽發背卒其不及拜公而先夫
人爲言公大節如此敢併記之以遺給事之孫
教授君云七月二十三日山陰陸某謹書

跋蔡君謨帖

近歲蘇黃米芾書盛行前輩如李西臺宋宣獻
蔡君謨蘇才翁兄弟書皆廢此兩軸君謨真行
草隸皆備石在仙井可寶也淳熙元年九月八
日蜀州手裝

跋瘞鶴銘

瘞鶴銘予親至焦山摹之止有此耳殘璋斷玦
當以真爲貴豈在多邪淳熙之元九月一日蜀
州重裝

跋西峴酬唱集

通直郎張玠河陽人呂汲公家外甥藏書甚富
淳熙二年正月八日夜讀此集燈架忽仆壞書
時傳畢方一日豈歐尹諸人亦有靈邪記之爲
異時一笑

跋歷代陵名

三榮守送來近世士大夫所至喜刻書版而略
不校讎鎔本書散滿天下更誤學者不如不刻

之愈也可以一歎淳熙乙未立冬可齋書

跋溫庭筠詩集

先君舊藏此集以華清宮詩冠篇首其中有早
行詩所謂雞聲茆店月人跡板橋霜者久已墜
失得此集於蜀中則不復見早行詩矣感歎不
能自己淳熙丙申重陽日某識

跋王君儀待制易說

王公易學雖出於葆光張先生然得於心者多

矣建炎間胡騎在錢塘明越俱陷王公端居於嚴曰虜決不至此且狼狽而歸自此窮天地不復渡江矣其妙於易數蓋如此淳熙丁酉元日山陰陸某書於錦官閣下

跋崔正言所書書法要訣

德符詩名一代書則未之見也觀此編中字瘦健有神采亦類其詩乃知前輩未易以一技名也戊戌重午務觀書

跋後山居士詩話

談叢詩話皆可疑談叢尚恐少時所作詩話決非也意者後山嘗有詩話而亡之妄人竊其名爲此書耳後山二子豐登登過江爲會稽曹官李鄴降虜登亦被驅以北悲夫淳熙戊戌十月二十四日可齋

跋佛智與升老書

此一編佛智禪師與其法子寒巖升公書也議

渭南文集
論超卓殆非世儒所及三復歎仰淳熙己亥三月九日建安雙清堂書

跋古栢圖

此圖吾家舊藏予居成都七年屢至漢昭烈惠陵此栢在陵旁廟中忠武侯室之南所謂先主武侯同閼宮者與此略無小異則画工亦當時名手也淳熙六年龍集己亥六月一日陸某識
渭南文集卷第二十六

渭南文集目錄

卷第二十七

跋中和院東坡帖

跋漢隸

跋晁百谷字敘

跋陵陽先生詩草

跋荆公詩

跋續集驗方

先左丞使遼語錄

跋朝制要覽

跋東坡問疾帖

跋東坡詩草

跋孫府君墓誌銘

跋蘇魏公百韻詩

跋家藏造化權輿

跋三蘇遺文

跋兼山先生易說

跋鄭虞任昭君曲

跋傅正議至樂菴記

跋陳師要覽

跋中興間氣集

跋齊驅集

跋柳柳州集

跋說苑

跋章氏辨誣錄

跋釣臺江公奏議

先太傅遺像

跋高康王墓誌

跋半山集

跋李深之論事集

跋李莊簡公家書

跋之罍先生稿

跋吳夢予詩編

跋松陵集

跋王仲言乞米詩

跋金奩集

跋韓非子

跋却掃編

跋彩選

跋陝西印章

跋詩橐

跋祕閣續帖張長史

率意帖

跋王深甫先生書簡

跋郭德誼墓誌銘

又

跋郭德誼書

率意題

題王默甫先生書簡

題得蒙

題頤園書牘

題澤

題刺西明章

題韓非子

題吐蕃辭

題王中書

題金華集

題吳費子

題外刻

渭南文集卷第二十七目錄終

渭南文集卷第二十七

山陰陸務觀著

跋中和院東坡帖

此一卷皆蘇仲虎尚書所藏鑒定精審無一帖

可疑者刻石在成都大聖慈寺中和勝相院淳

熙六年六月十七日陸務觀題

跋漢隸

漢隸十四卷皆中原及吳蜀真刻淳熙己亥集

於建安公署友人莆陽方士繇伯暮親視裝標

故無一字差謬者六月二十一日山陰陸某書
名者士所願也而或懼太早何哉吾測之審矣
少而得名我不能不矜人不能不忌以滿假之
心來讒慝之口幾何其不躓也吾元歸年甫二
十筆力扛鼎不患無名患太平耳雖然洪道方
力張其名而吾獨欲其退避揜覆元歸未必樂
也異時出入朝廷更歷世故會當思吾言也夫

淳熙庚子二月三日山陰陸某書

跋陵陽先生詩草

右陵陽先生韓子蒼詩草一卷得之其孫籍先
生詩擅天下然反覆塗乙又歷疏語所從來其
嚴如此可以爲後輩法矣予聞先生詩成旣以
予人久或累月遠或千里復追取更定無毫髮
恨廼止則此草亦未必皆定本也大歇菴詩一
章徐師川作而先生手錄之亦足見其無咎人

爭名之病矣故附見卷中淳熙庠子四月二十
二日笠澤陸某書

跋荆公詩

右荆公手書詩一卷前六首贈黃慶基後七首
贈鄧鑄石刻皆在臨川淳熙七年七月十七日
陸某謹題

跋續集驗方

予家自唐丞相宣公在忠州時著陸氏集驗方

故家世喜方書予宦遊四方所獲亦以百計擇
其尤可傳者號陸氏續集驗方刻之江西倉司
民爲心齋淳熙庠子十一月望日吳郡陸某謹
書

先左丞使遼語錄

右先楚公使遼錄一卷三十八伯父手書伯父
自幼被疾以左手書然筆力清健如此平生凡
鈔書至數十百卷云淳熙八年四月五日某謹

識

跋朝制要覽

先君會稽公晚歲喜觀此書間爲子弟講論因
革率至夜分先君捐館舍三十有四年統得此
於故廬伏讀悲哽敬識卷末淳熙八年龍集辛
丑十一月二十五日山陰陸某書

跋東坡問疾帖

東坡先生憂其親黨之疾委曲詳盡如此則愛

君憂國之際可知矣其曰勿使常醫弄疾天下
之至言讀之使人感歎彌日淳熙九年五月乙
未甫里陸某書

跋東坡詩草

東坡此詩云清吟雜夢寐得句旋已忘固已奇
矣晚謫惠州復出一聯云春江有佳句我醉墮
渺莽則又加於少作一等近世詩人老而益嚴
蓋未有如東坡者也學者或以易心讀之何哉

淳熙九年五月二十六日玉局祠吏陸某書於鏡湖下鷗亭

跋孫府君墓誌銘

方五代割裂時自一郡以上非其國子弟則大將功臣也士大夫仕爲令掾者已爲達官錢氏土境尤感而孫公至專城蓋其國顯人也觀杜公所述亦誠有以得之矣淳熙壬寅立秋日甫里陸某

跋蘇魏公百韻詩

右首一卷丞相魏公謝事歸第且八十時所作也蘇端明賀趙清獻公得謝啓云念平生之百爲一無可恨某於魏公亦云淳熙壬寅立秋日吳郡陸某謹識

跋家藏造化權輿

右造化權輿六卷楚公舊藏有九伯父大觀中題字淳熙壬寅得之故第廢紙中用別本讎校

而闕其不可知者兩本俱通者亦具疏其下六月四日山陰陸某謹記
舊錄有山陰父大贈中後十有四年慶元元年八月十二日重校凡三日而畢時年七十一

跋三蘇遺文

此書蜀郡呂商隱周輔所編周輔入朝爲史官得唐安守以歸未至家暴卒可悲也淳熙十一年正月十一日務觀識

跋兼山先生易說

郭立之從程先生遊最久程先生病革猶與立之有問畬語著於語錄而尹彥明獨謂立之自黨論起卽與程先生絕死亦不吊祭蓋愛憎之論也立之子雍字子和屏居峽中屢聘不起亦著易說得其家學蓋程氏易學立之父子實傳之淳熙甲辰二月三十日甫里陸務觀云

後六年得謝昌國所贈頤正先生辨尹公說乃

知予此言麤合也。頤正卽雍也已酉八月二十八日某書。

跋鄭虞任昭君曲

自張文潛下世樂府幾絕。吾友鄭虞任作昭君曲如羊車春草空芊芊及重瞳光射搔頭偏之類文潛殆不死也。但願夕烽長不驚甘泉妾身勝在君王前能道昭君意中事者。淳熙甲辰三月二十三日甬里陸某書。

跋傅正議至樂菴記

伏波將軍困於壺頭曳病足土室中以望夷賊左右哀之莫不爲流涕。定遠侯在西域三十年年老思土上書自言願生入玉門關詞指甚哀。彼封侯富貴矣然戚戚無聊乃如此其他盈滿艱危畏禍憂誅願爲布衣不可得者又何可勝歎然則富貴果不如貧賤之樂邪曰此自富貴者言之耳貧賤之士仕則無路處則無食自非

有道君子其憂又有甚者矣正議傳公在學校二十年聲震京師同舍生去爲公卿者袂相屬而公始僅得一第旣仕矣適時艱難妄男子往往起閭巷取美官公又棄不用則亦何自樂哉及讀所作至樂菴記自道其胸中恢疎磊落所以樂而忘憂者文辭辯麗動人有列禦寇莊周之遺風然後知公蓋有道者或曰使天以富貴易公之樂公其許之乎予曰公所以處貧賤者則其所以處富貴也顏回之簞瓢周公之衮黼一也觀斯文者盍以是求之淳熙十一年七月十六日山陰陸某謹書

跋中興間氣集二

高適字仲武此乃名仲武非適也評品多妄蓋淺丈夫耳其書乃傳至今天下事出於幸不幸固多如此可以一歎淳熙甲辰八月二十九日放翁書

高適字仲武此集所謂高仲武乃別一人名仲武非適也議論凡鄙與近世宋百家詩中小序可相甲乙唐人深於詩者多而此等議論乃傳至今事固有幸不幸也然所載多佳句亦不可以所託非其人而廢之

跋齊驅集

此集刻版於宣和三年方是時黨禁猶未解文士蓋僅有見者故本多誤然好事者冒法刻之

亦奇矣淳熙甲辰重午日陸務觀書

跋柳柳州集

此一卷集外文其中多後人妄取他人之文冒柳州之名者聊且裒類於此子京人王莫論又右三十一字宋景文公手書藏其從孫晟家然所謂集外文者今往往分入卷中矣淳熙乙巳五月十七日務觀校畢

跋說苑

李德芻云館中說苑二十卷而闕反質一卷曾
鞏乃分修文爲上下以足二十卷後高麗進一
卷遂足淳熙乙巳十月六日務觀書
古三跋章氏辨誣錄公平書藏其外紆是宋然
徽宗皇帝宗盛德大度自秦漢以來人主莫能及
者尤在友愛蔡王寬貸章惇而史臣不能發明
可爲太息淳熙丙午十月望陸某謹題

跋釣臺江公奏議

其乾道庚寅夏得此書於臨安後十有七年蒙
恩守桐廬訪其家復得三表及贈告墓志因併
刻之以致平生尊仰之意淳熙十三年十一月
十有六日笠澤陸某書

先太傅遺像

先太傅遺像

先太傅皇祐中以吏部郎中直昭文館自會稽
移守新定期年請老得分司西京以歸迄今百
四十年而其自奉祠玉局起爲是邦實繼遺躅

於是知建德縣事蘇君林以父老之請築祠宇
於兜率佛寺淳熙十四年春正月丙辰備車旗
儀物大合樂奉遺像於祠且以公自贊道帽羽
服像刻之堅珉慰邦人無窮之思朝隱子蓋公
自號云元孫朝請大夫權知嚴州軍州事陸某
謹書

跋高康王墓誌

王岐公文章閎麗有西漢風而宋常山公書法

森嚴實傳鍾張古學方裕陵致孝寶慈極天下
養故竝命兩公彰顯高氏先王功烈以詔萬世
可以爲寵光矣中更亂離而墨本寶藏如新殆
有神物護持云淳熙十四年二月三日笠澤陸
某謹識

跋半山集

右半山集二卷皆荆公晚歸金陵後所作詩也
丹陽陳輔之嘗編纂刻本於金陵學舍今亡矣

淳熙戊申上巳日笠澤陸某書

跋李深之論事集

唐丞相司空李公深之論事集有兩本其一本七卷無序其一本一卷史官蔣偕作序然以序考之則偕所序蓋七卷者也淳熙戊申四月十九日笠澤陸某識

跋李莊簡公家書

李丈參政罷政歸鄉里時某年二十矣時時來

訪先君劇談終日每言秦氏必曰咸陽憤切慨慷形於色辭一曰平旦來共飯謂先君曰聞趙相過嶺悲憂出涕僕不然謫命下青鞵布襪行矣豈能作兒女態邪方言此時目如炬聲如鐘其英偉剛毅之氣使人興起後四十年偶讀公家書雖徙海表氣不少衰叮嚀訓戒之語皆足垂範百世猶想見其道青鞵布襪時也淳熙戊申五月己未笠澤陸某題

跋之果先生橐

肩吾文忠公四世孫博學工文章與予蓋莫逆也晚來行在諸公貴人頗知之欲引置要津有毀之者肩吾既不偶乃調桂陽令去客姑蘇未繫舟暴疾一夕死哀哉嘉父捷爲人肩吾沒後數年始以進士起家淳熙戊申秋社日放翁書跋吳夢予詩編

山澤之氣爲雲降而爲雨勾者伸秀者實此雲

之見於用者也予嘗見早歲之雲乎嵯峨突兀起爲奇峰足以悅人之目而不見於用此雲之不幸也君子之學蓋將堯舜其君民若乃放逐顛頽娛悲舒憂爲風爲騷亦文之不幸也吾友吳夢予橐其歌詩數百篇於天下名卿賢大夫之主斯文盟者翕然歎譽之末以示余余愀然曰子之文其工可悲其不幸可吊年益老身益窮後世將曰是窮人之工於歌詩者計吾吳君

之情亦豈樂受此名哉余請廣其志曰窮當益
堅老當益壯丈夫蓋棺事始定君子之學堯舜
其君民余之所望於朋友也娛悲舒憂爲風爲
騷而已豈余之所望於朋友哉淳熙十五年十
一月二十六日甫里陸某書

跋松陵集

淳熙十六年四月二十六日車駕幸景靈宮予
以禮部郎兼膳部檢察賜公卿食訖事作假會

陵陽韓籀寄此集來云東都舊本也欣然讀之
時寓甌街巷街南小宅之南樓山陰陸某務觀
手識

此集蔡景繁舊物復嘗歸韓子蒼子蒼之孫籀
以遺予蓋百年前本也

景繁元豐中嘗爲開封推官此所題開封南司
者是也景繁二子居厚居易此題居厚者其長
也景繁臨川人而韓子蒼居臨川故得此書務

觀手記

跋王仲言乞米詩

仲言貸米本自欲就魯肅輩人而良齋又戒以勿取陶胡奴米仲言治已可謂嚴而良齋告之亦可謂忠矣數年來仲言以貧甚客長安中豪子資給殊厚今春忽捨去主人叩首乞少畱不可豈獨能踐初言亦不負良齋期待矣淳熙己酉四月二十七日陸某務觀書

跋金奩集

飛卿南鄉子八闋語意工妙殆可追配劉夢得竹枝信一時傑作也淳熙己酉立秋觀於國史院直廬是日風雨桐葉滿庭放翁書

跋韓非子

右韓非子一卷紹興丁卯先君年六十時傳吳棫才老本後四十有二年淳熙己酉某重裝而藏之時年六十有五十月九日史院東閣手識

跋却掃編

此書之作敦立猶少年故大抵無紹興以後事
淳熙已酉十一月十四日書於儀曹直廬

跋彩選

紹興甲戌七月三日予宅過此彩選畢景丙子
二月五日同季思訪務觀雲門山草堂復爲此
戲子宅記

紹興十九年正月十有七日友人王仲言父自

京江來以是書爲贈醕醢菴記

官制左右丞不爲平章事自侍郎拜者皆躡遷
尚書此書蓋失之

予宅季思下世忽已數年予今年六十有七覽
此太息然予方從事金丹丹成長生不死直餘
事耳後五百年過雲門草堂故趾思簪作彩戲
豈非夢邪紹熙元年上元日放翁書去子宅題
字時三十年矣

跋陝西印章

紹熙庚戌正月十九日夜閱故書得此追思在山南時已二十年同幙惟周元吉閤才元章德茂張季長及余五人尙亡急爾拊卷累欷放翁題

又十有五年當嘉泰之四年歲在甲子因暴書再觀則元吉才元德茂又皆物故數年矣季長在蜀累歲不得書存亡有不可知者而予年已

八十感歎不能已八月十六日務觀書

跋詩稿

此予丙戌以前詩二十之一也及在嚴州再編又去十之九然此殘稿終亦惜之乃以付子聿紹熙改元立夏日書

跋祕閣續帖張長史率意帖

此一帖在故簽書樞密王倫家倫出使時得之故都予少日嘗見之紹熙改元五月甲子甫里

陸某識時年六十有六距初見時四十有五年矣

跋王深甫先生書簡二

深甫先生以治平二年七月二十八日卒而此卷末畱其弟容季書是年六月一日相距無兩月矣悲夫紹熙元年六月望陸某書
此書朝夕觀之使人若居嚴師畏友之間不敢萌一毫不善意

跋郭德誼墓誌銘二

仲晦先生識郭公墓或恨其太簡然吾夫子銘季札曰於虘有吳延陵季子之墓財十字耳至今傳以爲寶彼賣菜求益之論可付一歎紹熙二年正月二十三日陸某謹書

又

顏魯公麻姑壇記東坡先生經藏記皆有大字小字兩本蓋用羊叔子峴山故事千載之後陵

谷變遷尙冀其一存爾德誼之名固自不朽然
吾元晦爲斯人計亦至矣豈希呂兄弟孝愛篤
至有以發之邪紹熙二年正月壬申笠澤陸某
識

跋郭德誼書

予童子時嘗避兵東陽山中距今六十年予長
德誼三歲計其年可以相從而不及也觀此遺
墨爲之太息紹熙二年正月二十三日笠澤老

漁陸某謹書

跋蘇氏

予童

跋郭

渭南文集卷第二十七

渭南文集目錄

卷第二十八

跋後山居士長短句

跋蘇氏易傳

跋資暇集雲莊詩集

跋法帖

跋法帖之刺今舉瀛又圖

跋蘭亭樂毅論并趙岐王帖

祭刺今舉文

跋蔡肩吾所作遽府君墓誌銘

跋原隸

跋京本家語

書集

跋李徂徠集

跋劉文老使君義居

跋遺戒吾叔子憲叔跋無逸講義

跋東坡帖跋論并跋跋東坡祭陳令舉文

跋劉凝之陳令舉騎牛圖

跋東坡七夕詞後跋張監丞雲莊詩集

跋淵明集跋陸史君廟籤

跋巴東集跋呂侍講歲時雜記

跋許用晦丁卯集跋李涪刊誤

跋歸去來白蓮社圖

跋釋氏通紀跋毛仲益所藏蘭亭

跋魏先生草堂集跋王輔嗣老子

跋前漢通用古字韻編

跋胡少汲小集跋曉師顯應錄

跋范巨山家訓跋張安國家問

跋坐忘論舍人自跋跋唐盧肇集

跋居家雜儀跋皇甫先生文集

跋南堂語

跋注心賦

跋朱新仲舍人自作墓誌

跋黃魯直書

跋...

跋...

跋...

跋...

跋...

渭南文集卷第二十八目錄終

渭南文集卷第二十八

山陰陸務觀著

跋後山居士長短句

唐末詩益卑而樂府詞高古工妙庶幾漢魏陳

無已詩妙天下以其餘作辭宜其工矣顧乃不

然殆未易曉也紹熙二年正月二十四日雪中

試朱元亨筆因書

跋蘇氏易傳

此本先君宣和中入蜀時所得也方禁蘇氏學

故謂之毗陵先生云紹熙辛亥七月二十日陸某識

明本脫一行

跋資暇集

吾家舊有此本先左丞所藏書字簡樸疑其來久矣首曰隴西李^所文濟翁編^并字猶成文也久已淪墜忽尤延之寄刻本來爲之愴然紹熙二年十一月二十九日陸某識

跋法帖

此本嘗見之清勁可愛及移之石乃爾失真拙工誤人如此乾符元年十一月乃改元此云三月何邪蔡君謨用螭字^穎字俱非是又何邪紹熙三載正月二十二日三山下漚亭書

又

魯公書殊不類紙乃煙熏周副之語尤俚俗羅紹威用羅氏世寶印犯唐諱益可疑跋語詩句亦鄙甚也君謨豈至是哉惟錢希白字奇古可

喜然非題顏帖乃翦它軸附卷後耳

跋蘭亭樂毅論并趙歧王帖

某恭聞太宗皇帝天縱聖學跨軼百王萬幾之餘尤畱神翰墨文昭武穆世受筆法有若歧簡獻王得稿書之妙蓋其爲學上稽三代兩漢以象其高古下專以晉右將軍王羲之爲法以極其變化所藏魯公作文王尊彝伯禽祀文王之器紹聖間詔取藏祕閣宣和博古圖亦列於他

周器上又政和中關中發地得竹簡皆東漢討
弋書檄字作章草好事者爭取而王獨多獲之
則王之窮深造微豈寒窶書生所及哉至蘭亭
脩禊序樂毅論又王所愛玩天下名本王之於
書名尊一代固無足異今周器漢札雖不可復
見而脩禊序樂毅論如魯靈光歸然獨存意有
神物護持非適然也王遺墨藏家廟者今雖僅
存某嘗獲觀皆奇麗超絕動心駭目往時米芾

於書少許可獨推王以爲能學古人語在芾所著書畫史王之孫不流以從官長東諸侯懼書家不能盡見是奇蹟廼諏良工併刻樂石置會稽郡齋而屬其書其後惟王歷事累朝典司宗盟嘉言善行不可勝載文章尤長於詩有唐人餘風此特論其書而已紹熙四年正月辛卯中奉大夫提舉建寧府武夷山冲佑觀山陰縣開國男食邑三百戶陸某謹書

跋蔡肩吾所作遽府君墓誌銘山公祖翁
蔡迨肩吾與予同官犍爲郡文辭字畫皆過人自蜀入吳持予書見友人許昌韓无咎无咎時爲吏部侍郎薦之甚力且有除命矣蜀士有排之者肩吾遂從銓部得桂陽令行至吳門暴死舟中每念之未嘗不流涕也不識肩吾者讀此文亦足知其不凡矣遽昌老字真叟亦佳士蓋與肩吾爲方外友云紹熙癸丑立夏日笠澤陸

務觀書

跋原隸

故吏部郎宇文卷臣所著卷臣爲郎數月坐口語亟去晚守臨邛廣漢有能名然亦以謗絀遂卒於家可哀也紹熙癸丑四月二十一日老學菴書

跋京本家語

本朝藏書之家獨稱李邯鄲公宋常山公所蓄

皆不減三萬卷而宋書校讐尤爲精詳不幸兩遭回祿之禍而方策掃地矣李氏書屬靖康之變金人犯闕散亡皆盡收書之富獨稱浙江繼而胡騎南驚州縣悉遭焚劫異時藏書之家百不存一縱有在者又皆零落不全予舊收此書得自京師中遭兵火之餘一日於故篋中偶尋得之而蟲齧鼠傷殆無全幅綴緝累日僅能成秩乃命工裁去四周所損者別以紙裝背之遂

成全書嗚呼予老嬾目昏雖不復讀然嗜書之心固未衰也後世子孫知此書得存之如此則其餘諸書幸而存者爲予寶惜之紹興戊午十月七日雙清堂書
後五十有七年復脫壞不可挾子聿亟裝緝之持以相示方先少保書此時某年十四今七十矣不覺老淚之濡睫也紹熙甲寅閏月四日第三男中大夫某謹識

跋李徂徠集

中野去魯歸周三詩可以追婉退之琴操而世不甚傳使予得見李公當百拜師之不特願爲執鞭而已紹熙甲寅六月二日書

跋劉文老使君義居遺戒

祥符中天子封禪講墜典以文太平詔求孝義之門於是天下以名聞者數十家遠不過十世獨吾鄉裘承詢自齊梁以來十九世如一日郡

國莫先焉吾亡友劉文老歿當上一子世其祿而長子復辭以予其季蓋文老所未嘗命者於未嘗命者如此況其所命者乎將見世世守遺訓不墜十九世豈足道哉紹熙甲寅中秋日陸某識

不其跋無逸講義李公當百拜讀之不特願為

按實錄元祐五年二月壬寅邇英閣講畢無逸篇詔諱錄所講以進今後具講義次日別進壬

寅是月七日也與此卷首所云面奏乞候講畢錄進乃不同恐當以此爲正紹熙五年八月十日陸某謹識

跋東坡帖其刊心錄爲金百辭原去爲師

此碑蓋所謂橫石小字者邪頃又嘗見監石本字亦不絕大數簡行筆尤奇妙可貴與成都西樓十卷中所書郭熙山水詩頗相甲乙也紹熙甲寅十月二十三日務觀題

跋東坡祭陳令舉文

東坡前後集祭文凡四十首惟祭賢良陳公辭指最哀讀之使人感歎流涕其言天人予奪之際雖若出憤激然士抱奇材絕識沉壓擯廢不得少出一二則其肝心凝爲金石精氣去爲神明亦烏足怪彼憤憤者固不知也紹熙甲寅十二月二十九日笠澤陸某謹書

跋劉凝之陳令舉騎牛圖

公卿貴人方黃金絡馬傳呼火城中時欲如三公騎牛山谷蕭散遺物固不可得若予者仕旣齟齬及斥歸欲買一黃犢代步其費二萬有畸作欄蓄童又在此外遂一笑而止徒有此生猶著幾兩屐之歎乃知二公風流亦未易追也紹熙甲寅十二月二十九日陸某識

跋東坡七夕詞後

昔人作七夕詩率不免有珠櫳綺疏惜別之意

惟東坡此篇居然是星漢上語歌之曲終覺天
風海雨逼人學詩者當以是求之慶元元年元
日笠澤陸某書

跋張監丞雲莊詩集

虜覆神州七十年東南士大夫視長淮以北猶
傖荒也以使事往者不復黍離麥秀之悲殆無
以慰奮父老心今讀張公爲奉使官屬時所賦
歌詩數十篇忠義之氣鬱然爲之悲慨彌日慶

元改元九月二十七日陸某書

跋淵明集

吾年十三四時侍先少傳居城南小隱偶見藤
床上有淵明詩因取讀之欣然會心曰且莫家
人呼食讀詩方樂至夜卒不就食今思之如數
日前事也慶元二年歲在乙卯九月二十九日
山陰陸某務觀書於三山龜堂時年七十有一

曾青跋陸史君廟籤

管者龐德公未曾入州府襄陽耆舊間處士節
獨苦豈無濟時策終竟畏罹咎林茂鳥有歸水
深魚知聚舉家隱鹿門劉表焉得取二十八日
射洪陸史君廟以杜詩爲籤極靈余自蜀被召
東歸將行求得此籤後十四年乃決意不復仕
宦媿吾宗人多矣紹熙辛亥十二月十日山陰
陸務觀書

跋巴東集

予自乾道庚寅入蜀至淳熙戊戌東歸九年間
兩過巴東登秋風白雲二亭觀萊公手植檜未
嘗不悵然流涕恨古人之不可作也又十有七
年慶元丙辰六月二十四日山陰陸某書時年
七十二

跋呂侍講歲時雜記

承平無事之日故都節物及中州風俗人人知
之若不必記自喪亂來七十年遺老凋落無在

者然後知此書之不可闕呂公論著實崇寧大觀間豈前輩達識固已知有後日邪然年運而往士大夫安於江左求新亭對泣者正未易得撫卷累歎慶元三年二月乙卯笠澤陸某書

跋許用晦丁卯集

許用晦居於丹陽之丁卯橋故其詩名丁卯集在大中以後亦可爲傑作自是而後唐之詩益衰矣悲夫慶元丁巳六月四日放翁識

跋李涪刊誤

王行瑜作亂宗正卿李涪盛陳其忠必悔過及行瑜傳首京師涪亦放死嶺南疑卽此人也丁巳七月十六日識

跋歸去來白蓮社圖

予在蜀得此二卷蓋名筆規模龍眠而有自得處季子子聿手自裝褫藏之慶元丁巳中秋前三日放翁識

跋釋氏通紀

予少時避兵東陽山中有沈師者丞相恭惠公之裔近有僧來往天衣山自言歐陽文忠公家今又得脩公所著釋氏通紀觀之則建炎樞臣盧公諸孫也近世不以世類求人名門大家散而爲方外道人者多矣如脩公旣棄衣冠猶能博學強記寓史氏法於是書亦賢矣夫慶元丁巳重九日放翁陸某務觀識

跋毛仲益所藏蘭亭

龍瘖雲氣而上天鳳凰翔於千仞吾見舊定本蘭亭其猶龍鳳邪慶元丁巳十一月二十日笠澤陸某務觀書

跋魏先生草堂集

按國史野陝人沈存中筆談以爲蜀人居陝州不知何所據也予在蜀十年亦不聞野爲蜀人筆談蓋誤也慶元戊午得之書肆十月十九日

龜堂病叟手識時年七十有四矣十月十六日

跋王輔嗣老子

晁以道謂王輔嗣老子題曰道德經不析乎道德而上下之猶近於古此本乃已析矣安知其他無妄加竄定者乎慶元戊午十月晦書

跋前漢通用古字韻編

古人讀書多故作文時偶用一二古字初不以爲工亦自不知孰爲古孰爲今也近時乃或鈔

綴史漢中字入文辭中自謂工妙不知有笑之者偶見此書爲之太息書以爲後生戒己未三月二十四日龜堂識

跋胡少汲小集

少汲之兄名僧孺字唐臣在元祐紹聖間亦知名士也少汲十詩中一篇所謂阿兄驚世才者是也周秀實名蔚予亡姑之子及與元祐前輩游紹興十六七年猶亡恙有文集數十卷王性

之作序少伋倡酬最多班班見於此集秀實有子名曇文者乃翁每稱其穎異自先少師捐館兩家相去地遠不復相聞每爲之惻愴於懷也因讀少汲小集併書之慶元己未七月一日老學菴書

跋曉師顯應錄

法華之爲書天不足以喻其大海不足以喻其深利根之士一經目一歷耳自不能捨雖舉天

下沮之彼且不動尚何勸相之有哉然人之根性利鈍蓋有如天淵者善知識諄諄告語誘之以福報懼之以禍罰亦有不得已者譬之世法道德風化固足坐致唐虞三代之治矣而賞以進善罰以懲惡亦烏可廢哉觀曉師顯應錄者當作是觀慶元己未立秋日山陰陸某書

跋范巨山家訓

人莫不愛其子孫愛而不知教之猶弗愛也人

莫不思其父祖思而不知奉其教猶弗思也使
爲人父祖者皆如范氏之先爲人子孫者皆如
吾友巨山世其有不興者乎吾所謂興者天地
鬼神與之鄉人慕之學者尊之是爲興不然雖
門列戟床堆笏德弗稱焉何興之有巨山之子
旣以文章擢高科公卿將相之儲也故予思廣
其意而書其家訓後如此巨山父子不以予爲
老悖則將有感也夫巨山名中立其子名薰慶

元己未八月晦山陰陸某謹書

跋張安國家問

東坡先生書遍天下而黃門公所藏至寡蓋常
以爲易得雖爲人持去不甚惜也紫微張舍人
書帖爲時所貴重錦囊玉軸無家無之今大宗
伯兄弟自爲知己家書往來蓋以百計矣相稱
相勉期以遠者亦何可勝計而今所存財五紙
耳方紫微亡急時豈亦以爲易得故多散逸邪

某筭者及爲紫微客今老病臥家而大宗伯猶以世舊寄此卷命寓姓名於後某自浮玉別紫微三十六年之間摧頽抵此紫微若尙在而見之且不能識則大宗伯尙何取哉援筆至此慨然不知衰涕之集也慶元五年十一月戊申笠澤陸某書

跋坐忘論

此一篇劉虛谷刻石在廬山以予觀之司馬子

微所著八篇今筭賢達之所共傳後學豈容置疑於其間此一篇雖曰簡略詳其義味安得與八篇爲比兼旣謂出於子微乃復指八篇爲道士趙堅所著則堅乃子微以前人所著書淵奧如此道書仙傳豈無姓名此尤可驗其妄予故書其後以祛觀者之惑己未十一月二十一日放翁書

跋唐盧肇集

子發嘗謫春州而集中誤作青州蓋字之誤也
題清遠峽觀音院詩作青州遠峽則又因州名
而妄竄定也前輩謂印本之害一誤之後遂無
別本可證真知言哉病馬詩云塵土臥多毛已
暗風霜受盡眼猶明足爲當時佳句此本乃以
已爲色猶爲光壞盡一篇語意未必非妄校者
之罪也可勝歎哉慶元庚申二月三日放翁燈
下書

明本無朱字

跋居家雜儀

王性之言熙寧初有朝士集於相藍之燒朱院
俄有一人末至問之則王元澤也時荆公方有
召命衆人問舍人不堅辭否元澤言大人亦不
敢不來然未有一居處衆言居處固不難得元
澤曰不然大人之意乃欲與司馬十二丈卜鄰
以其修身齊家事事可爲子弟法也某聞此語
六十年矣偶讀居家雜儀遂識之慶元庚申五

月四日書

跋皇甫先生文集

右一詩在浯溪中興頌傍石間持正集中無詩
詩見於世者此一篇耳然自是傑作近時有容
齋隨筆亦載此詩乃云風格殊無可采人之所
見恐不應如此或是傳寫誤爾慶元六年五月
十七日龜堂書

跋南堂語

予入蜀時南堂入滅已久獨有一二弟子在然
皆破齋犯律諸禪皆詆訾之予亦以衆毀意薄
其爲人及其死也乃卓然穎脫人亦不得而議
是誠未易測也庚申五月壬戌書於龜堂

跋注心賦

世之未通佛說者觀此亦得其梗槩矣慶元庚
申七月庚申龜堂老人書

跋朱新仲舍人自作墓誌

秦丞相擅國十九年而朱公竄嶠南者十有四
年僅免僵仆於炎瘴中耳以此胸中浩然無愧
將終自識其墓辭氣山立向使公諂附以苟富
貴至暮年世事一變方憂愧內積惟恐聞人道
其平日事其能慨然奮筆自敘如此乎慶元六
年秋社日笠澤陸某謹書

跋黃魯直書

老子曰豫兮若冬涉川猶兮若畏四鄰山谷此

卷蓋有得於此慶元庠申重九日笠澤陸某書

少卿帖

渭南文集卷第二十八

渭南文集目錄

卷第二十九

跋蘭亭序

跋李少卿帖

跋樂毅論

跋李朝議帖

跋東方朔畫贊

跋李虞部與范忠宣

公啓

跋范文正公書

跋東坡帖

跋盧衷父絕句

跋四三叔父文集

跋王右丞集

跋歐陽文忠公疏草

跋盤澗圖

跋爲琰師書維摩經

跋東坡諫疏草

跋東坡代張文定上

疏草

跋楊處士村居感興

跋朱氏易傳

跋晁以道書傳

跋嵩山景迂集

跋任德翁藥桴集

跋洪慶善帖

跋蒲郎中易老解

跋陸子彊家書

跋子聿所藏國史補

跋火井碑

跋韓晉公牛

跋画橙

跋臨帖

跋米老画

跋潘幽老帖

跋薌林帖

跋陳魯公所草親征

詔

跋蔡忠懷送將歸賦

跋東坡書髓

跋范元卿舍人書陳

公實長短句後

跋謝師厚書

跋雲丘詩集後

跋呂舍人九經堂詩

跋韓忠獻帖

跋高大卿家書

公實

跋

跋東

跋

跋

跋

跋

跋

跋

跋

跋

跋

渭南文集卷第二十九目錄

終

渭南文集卷第二十九

山陰陸務觀著

跋蘭亭序

觀蘭亭當如禪宗勘辨入門便了若待渠開口
堪作什麼識者一開卷已見精麤或者推求點
畫參以耳鑑瞞俗人則可但恐王內史不肯爾
余平生見佳本亦多然如武子所藏不過三四
真可寶也慶元庚申重九日笠澤陸某書

跋李少卿帖

宣城李氏自推官至今八九世詩人不絕蓋時
有如少卿者振起之也慶元庚申九月二十日
笠澤陸某書

跋樂毅論

樂毅論縱橫馳騁不似小字瘞鶴銘法度森嚴
不似大字此後世作者所以不可仰望也庚申
重九陸某書

跋李朝議帖

胡唐臣僧孺少汲直孺兄弟爲江西名士其朋
友亦皆知名朝議公蓋其一也慶元庚申重九
日陸某書

跋東方朔畫贊

元豐間有德州士人攜畫贊示東坡自言二百
年前本家藏數世矣東坡爲題之曰畫贊世多
本惟德州者第一君所藏又爲德州第一或曉
之曰此言君是德州人耳其人雖不伏亦大笑

止因觀武子所藏聊識卷末慶元六年九月甲子陸某務觀書

跋李虞部與范忠宣公啓

某家藏先大父遺書其櫝背多當時士大夫牋啓刺字不過曰尙書左丞或曰左丞中大而已數十百人無一人異者此建中靖國之元也上距元祐又十餘年風俗淳厚可知況丞相忠宣公與虞部李公之相與親厚者乎宜其不爲諂

也諸公或以今日耳目求之過矣夫慶元庚申九月二十一日陸某書

跋范文正公書

觀文正范公書札如欲與韓魏公同薦李泰伯見其進賢之誠戒余安道石守道避禍見其愛惜人材之意於虜賢哉然泰伯卒棄不用安道守道俱陷患難或至死不解志士仁人至今以爲歎信乎明喆保身之難也慶元庚申九月二

十九日笠澤病叟陸某書

跋東坡帖

成都西樓下有汪聖錫所刻東坡帖三十卷其間與呂給事陶一帖大略與此帖同是時時事已可知矣公不以一身禍福易其憂國之心千載之下生氣凜然忠臣烈士所當取法也予謂武子當求善工堅石刻之與西樓之帖竝傳天下不當獨私囊褚使見者有恨也

跋盧衷父絕句

客懷耿耿自難寬老傍京塵更鮮歡遠夢已回窗不曉杏花同度五更寒

盧衷父絕句衷父名蹈青社人今寓犍爲郡夾江縣佳士也

跋四三叔父文集

先楚公捐館時叔父未成童已從章貢黃先生安時學喪禮覆講無小差蓋天資精敏如此謹

附書於遺文之後以示後人

跋王右丞集

余年十七八時讀摩詰詩最熟後遂置之者幾六十年今年七十七永晝無事再取讀之如見舊師友恨間濶之久也嘉泰辛酉五月六日龜堂南窗書

跋歐陽文忠公疏草

慶曆之盛蓋庶幾漢文景矣而賢人君子猶如

是之難文忠公之奏議非獨不明諸公之讒也身亦墮排陷中滁州之謫是已於虜悲夫嘉泰二年人曰笠澤陸某書

跋盤澗圖

紹興己卯庚辰之間予爲福州決曹延平張仲欽爲閩縣大夫朝暮相從後四年予佐京口仲欽佐金陵數以檄往來於鍾阜浮玉間把酒道舊甚樂又二十年予使閩中仲欽間居延平數

相聞方約相過而予蒙恩召還遂有死生之異
言之悵然仲欽之子爲西和守寄此軸來求詩
蓋又二十餘年予年七十有七矣嘉泰改元歲
辛酉五月十九日陸某書時予納祿已三年居
會稽山陰之三山

跋爲琰師書維摩經

鄉僧琰上座求予書維摩詰所說法欲刻石施
四衆以薦其母會予病不能卽如其請琰十返

不厭孝哉此僧吾徒所樂從也乃力疾爲書嘉
泰壬戌正月二十一日放翁書

跋東坡諫疏草

天下自有公論非愛憎異同能奪也如東坡之
論時事豈獨天下服其忠高其辯使荆公見之
其有不撫几太息者乎東坡自黃州歸見荆公
於半山劇談累日不厭至約十鄰以老焉公論
之不可揜如此而紹聖諸人乃遂其伎心投之

嶺海必死之地何哉此疏藏馮氏三世八十年
矣真可寶哉嘉泰壬戌二月七日笠澤陸某謹
書
論跋東坡代張文定上疏草
張安道實一時偉人以其論新法諫用兵則不
得不爲忠以其力排吳育深惡石介歐陽文忠
公司馬文正公斥之於前呂正獻公抑之於後
則似有可議者然東坡此疏則自與日月爭光

安道之爲人不與焉元祐初盡起舊老安道獨
置不問近臣請加恩禮亦不報更奪其宣徽使
議者以爲多出正獻公之意云嘉泰壬戌二月
七日笠澤陸某謹書

跋楊處士村居感興

一壺村酒膠牙酸十數胡皴徹骨乾隨著四婆
帚子後杖頭挑去賽蠶官
右畢仲荀景儒所記楊處士詩也四婆卽處士

之配也蘇嶠季真家有處士夫妻像埜逸如生
恨不曾傳摹得之它日見蘇氏子孫尚可畢此
志也嘉泰癸亥放翁書於三山老學菴北窗

跋朱氏易傳

易道廣大非一人所能盡堅守一家之說未爲
得也元晦尊程氏至矣然其爲說亦已大異讀
者當自知之嘉泰壬戌四月十二日老學庵識

跋晁以道書傳

晁以道著書專意排先儒故其言多而不通然
亦博矣凡予家所錄本多得於以道孫子闔子
闔本自多誤予方有吏役故所錄失誤又多不
暇校定及謝事居山陰欲得別本參攷又不能
致可恨也壬戌四月十八日老學菴記時年七

十八

跋嵩山景迂集

景迂鄜時排悶詩云莫言無妙麗土稚動金門

蓋鄙人善作土偶兒精巧雖都下莫能及宮禁
及貴戚家爭以高價取之喪辭隔絕南人不復
知此句遂亦難解可歎嘉泰壬戌四月二十四
日放翁識
跋任德翁藥桴集
德翁感遇篇云言行身不用無迺我所欲長沙
地卑溼正可高閣足其議賈生可謂善矣所抱
如此排擯至死天下之不幸也壬戌五月一日

老學菴書

跋洪慶善帖

某兒童時以先少師之命獲給掃洒丹陽先生
之門退與子威講學則兄弟如也每見子威言
洪成季慶善學行然皆不及識今獲觀慶善遺
墨亦足少慰衰病廢學負師友之訓如媿何嘉
泰五年五月丁卯陸某謹記

跋蒲郎中易老解

易學自漢以後寢微自晉以後與老子並行其說愈高愈非易之舊宋興有酸棗先生以易名家同時种豹林亦開門傳授傳至邵康節遂大行於時然康節欲以授伊川程先生乃拒弗受而伊川每稱胡安定王荊公易傳以爲今學者所宜讀惟此二家王公乃自毀其說以爲不足傳著論悔之易之難知如此夜讀蜀蒲公易傳老子解喟然歎曰公於易與老子蓋各自立說

迹若與晉諸人同而實異也書以遺其族孫申仲試以予言請問信何如也嘉泰二年九月丁卯笠澤陸某書

跋陸子彊家書

吾友伯政持其先君子家問來讀之累日不厭使學者皆能如此孰得而訾病之雖有訾者吾可以無愧矣乃令子聿鈔一通置篋中時覽觀焉嘉泰壬戌十月二十三日宗人某書

跋子聿所藏國史補

子聿喜蓄書至輟衣食不少吝也吾世其有興者乎嘉泰壬戌閏月幾望放翁記時年七十有八以同修國史兼祕書監居六官宅第六位

跋火井碑

予嘗在征西幙府嘗得小校言火山軍地枯燥不可耕鋤犁入地不及尺烈火隨出今江吳間穿地尺餘則見水北人聞之亦未必信也夜讀

蜀彭君火井碑乃知天地間何所不有亦喜彭君之善記事也嘉泰壬戌閏月十有五日日山陰陸某務觀書

跋韓晉公牛

予居鏡湖北渚每見村童牧牛於風林煙草之間便覺身在圖畫自奉詔紬史逾年不復見此寢飯皆無味今行且奏書矣奏後三日不力求去求不聽輒止者有如日嘉泰癸亥四月一日

笠澤陸某務觀書

嘉泰癸亥四月十六日

跋畫橙

今計且奏書矣奏外三日不來

嘉泰癸亥四月十六日兩朝實錄將進書予以

史官兼祕書監宿衛於道山堂之東直舍茶罷

取此軸摩挲久之覺香透指爪此物著霜時予

歸鏡湖小園久矣山陰陸某務觀書

跋臨帖

嘉泰癸亥四月十五日

此書用筆靄靄多態度如雙鉤鍾王遺書可寶

藏也笠澤陸某務觀跋時年七十九當嘉泰癸亥

四月二十八日居於六官宅老學行庵

跋米老畫

嘉泰癸亥四月二十八日

畫自是妙迹其爲元章無疑者但字却是元暉

所作觀者乃并畫疑之可歎也嘉泰癸亥四月

二十九日陸某務觀書

跋潘函老帖

潘函老詩妙絕世恨不見其字今見此卷無復

遺恨矣癸亥五月一日笠澤陸某書

跋薌林帖

先少師使淮南實與薌林向公爲代薌林作雍熙堂於解中堂之前有井泉甘寒宜茶洪駒父聞之寄詩云何如喚取陸鴻漸石鼎風爐來試茶詩與除代堂帖同日到薌林大以爲異手書報先少師今尙在也伏觀公移文奏牘稿大節貫金石然諸公所書已可傳世贅書之亦屋下

架屋耳而某家世所傳足補薌林逸事者則不可不書以遺後人嘉泰三年五月十日陸某謹書

跋陳魯公所草親征詔

紹興辛巳壬午之間某由書局西府掾親見丞相魯公經綸庶務鎮服中外有人所不可及者然猶不知此詔爲出於公也後四十有三年某行年且八十偶幸未先犬馬獲見公手稿於庫

公之謙厚不伐與露才揚已者相去何啻千萬哉追懷盛德大度如巨山喬嶽凜然猶在目前爲之竇涕嘉泰三年五月十二日門人前史官陸某謹書

跋蔡忠懷送將歸賦

予讀送將歸之賦爲之流涕不爲蔡氏也宋興百餘年累聖致治之美庶幾三代熙寧元祐所任大臣蓋有孟陽之學稷卨之忠而朋黨反因

之以起至不可復解一家之禍福曲直不足言也爲之子孫者能力學進德不爲偏諛則承家報國皆在其中矣嘉泰二年五月十五日山陰陸某書於浙江亭

跋東坡書髓

成都西樓下石刻東坡法帖十卷擇其尤奇逸者爲一編號東坡書髓三十年間未嘗釋手去歲在都下脫敗甚乃再裝緝之嘉泰三年歲在

癸亥九月三日務觀老學菴北窗手記

跋范元卿舍人書陳公實長短句後

紹興庚申辛酉間予年十六七與公實遊時予從兄伯山仲高葉晦叔范元卿皆同場屋六人者蓋莫逆也公實謂予小陸兄後六十餘年五人皆已隔桴歿予年七十九而公實郎君居字伯廣者出此軸恍然如與公實元卿聯杖履均茵憑也爲之太息彌日因識其末雖然使死而

有知吾六人者安知不復相從如紹興間乎會當相與挈手一笑尙何歎嘉泰癸亥十月二十九日笠澤釣叟陸某書

跋謝師厚書

謝師厚早歲與歐陽充公王荆公梅直講江記注諸人遊名甚盛晚更蹭蹬居穰下二十餘年學愈進文章愈成獨後諸公死子惛惛甥黃魯直皆知名天下然年運而往士大夫鮮能知師

厚者今觀吾友傳漢孺所藏其上世墓刻實師
厚遺文至送行詩雜之宛陵詩中殆不可辨字
則宋宣獻父子之流亞也爲之太息嘉泰癸亥
立春後四日笠澤陸某書時年七十九

跋雲丘詩集後

宋興詩僧不愧唐人然皆因諸巨公以名天下
林和靖之於天台長吉宋文安之於凌雲惟則
歐陽文忠公之於孤山惠勤石曼卿之於東都

祕演蘇翰林之於西湖道潛徐師川之於廬山
祖可蓋不可殫紀潛可得名最重然世亦以蘇
徐兩公許之太過爲病餘則徒得所附託故聞
後世非能歸然自傳也予觀雲丘詩平淡閒暇
蓋庶幾可以自傳者政使不遇呂居仁蘇養直
朱希真王性之范至能亦決不泯沒況如予者
烏足爲斯人重哉其徒覺淨以遺稿來求題其
後十款吾門不厭故爲之書嘉泰四年二月乙

已笠澤陸某書

跋呂舍人九經堂詩

前輩以文章名世者名愈高則求者愈衆故其間亦有徇人情而作者有識之士多以爲恨如呂公九經堂詩蓋自少時與昭德尊老諸公師友淵源講習漸漬所得又爲其子孫而發故雄筆大論如此於虀凜乎其可敬畏也哉嘉泰四年六月庠子陸某書

跋韓忠獻帖

方曩霄犯邊時忠獻王首當禦戎重任功冠諸公後入輔帷幄陳謨畫策駕馭人材鎮服虜情自曾集賢以降皆協贊而已觀此帖可槩見也嘉泰四祀六月辛丑故史官山陰陸某謹識

跋高大卿家書

子長大卿娶予表從母之女故自少時相從後又同入征西大幕情分至厚讀此數書如見其

長身蒼髯，意象軒舉也。嘉泰甲子歲夏六月壬

寅，放翁陸某書。

渭南文集卷第二十九

書

